

杭州府志
(乾隆)

二三

杭州府志卷一百十七

名宦二

宋

王淵字幾道熙州人宣和五年劉延慶討方臘以淵爲先鋒賊將據錢塘勢張甚淵諭小校韓世忠伏弩逐北至淳安幫源峒圍而平之授閤門宣贊舍人康王卽位以淵爲制置使誅杭賊陳通於杭州提兵四出所向皆捷

宋史本傳

韓世忠字良臣延安人初以偏將從王淵次杭州討方臘賊奄至世忠以兵二千伏北關堰賊過伏發衆噪亂世忠追擊賊敗遁世忠窮追至睦州青溪峒仗戈渡險數里擣其穴格殺數十人禽臘

以出辛興宗掠其俘爲己功建炎二年升定國軍承宣使三年聞
帝如錢塘卽由海道赴行在苗傅劉正彥反世忠舉酒酹神曰誓
不與此賊共戴天三月以所部發平江至秀州稱病不行造雲梯
治器械進兵次臨平賊將苗翊馬柔吉負山阻河爲陣中流植鹿
角梗行舟世忠舍舟力戰軍少卻復舍馬操戈而前賊列神臂弩
持滿以待世忠瞋目大呼挺刃突前賊辟易矢不及發遂敗傳正
彥開湧金門遁詔授武勝軍節度使御營左軍都統制請於帝曰
賊擁精兵距甌閩甚邇倘成巢窟卒未可滅臣請討之於是以爲
江浙制置使自衢信追擊至魚梁驛與賊遇賊驚潰禽正彥及弟
翊送行在皆伏誅帝手書忠勇字揭旗以賜授檢校少保武甯昭

慶軍節度使封蘄王卒諡忠武

宋史本傳

裴莊字端已閬中人景德初安撫兩浙奏能吏二十人慢官者五人多所升黜莊有吏幹忼慨敢言太宗獎其忠讜多聽納焉

乾隆志

胡唐老字俊明晉陵人崇甯進士建炎三年進徽猷閣待制充兩浙宣撫司參謀官知鎮江府兼浙西安撫使杜充降於金建康失守潰卒戚方等趨鎮江城壁頽圯兵不滿千獨倚浙西制置韓世忠爲重世忠復去唐老度力不敵因撫之無何方欲犯臨安妄言赴行在請唐老部衆以行唐老不從諭以逆順禍福方衆環脅之唐老怒罵方遂遇害詔贈徽猷閣直學士諡定愍

宋史忠義傳

楊允恭綿竹人太宗時以功轉洛苑副使江淮兩浙都大發運擘

畫茶鹽捕賊事先是三路轉運使各領其職或廩庾多積而軍士舟楫不給雖以官錢顧丁男挽舟而上人憚其役以是歲上供米不過三百萬允恭盡籍三路舟卒與所運物數令諸州擇牙吏悉集允恭乃辦數授之江浙所運止於淮泗由淮泗輸京師行之一歲上供者六百萬咸平初爲荆湖江浙都巡檢使二年卒

宋史本傳

陳遘字亨伯其先自江甯徙永州登進士第歷官發運使宣和二年冬方臘亂詔以屬遘加龍圖閣直學士經制七路治於杭言妖賊陵暴州縣惟搜求官吏恣行殺戮往往斷截支體採取肺肝或熬以鼎油或射以勁矢備極慘毒不償怨心蓋貪污嗜利之人倚法侵牟不知藝極積有不平之氣結於民心一旦乘勢如此可爲

悲痛此風不除必更生事臣願採撫官吏姦賊尙仍舊習者按治以聞乞重寘於理許之於是劾越州王仲疑糾市民造金茶器減直買軍糧券仲疑坐黜杭經巨寇後河渠堙窒邦人以水潦爲病前守數請於朝皆以勞費輟役邁以冬月檄真揚潤楚諸郡凡守牘綱卒悉集治所先是當閉牘羣卒無食率凍餓不自聊聞命相率呼舞以來者二千人用其力治河不兩月畢杭人利焉

宋史本傳

吳淵字道父甯國人嘉定七年進士理宗時提點浙西刑獄歷知鎮江府兼都大提舉浙西沿海諸州軍許浦澈浦等處兵船歲大侵因淵全活者六十五萬餘人後知平江府兼浙西兩淮發運使歲亦大侵全活四十二萬人除浙西提點刑獄寶祐五年拜參知

政事卒

宋史
本傳

孫長卿字次公揚州人仁宗時爲江浙荆淮發運使歲漕米至八百萬或疑其多長卿曰吾非欲事羨贏以備饑荒爾神宗知其能轉兵部侍郎長卿長於政事爲能臣性廉潔不以一毫取諸人

宋史

本傳

王鼎字鼎臣館陶人進士第仁宗時提點兩浙刑獄累遷淮南兩浙荆湖制置發運使前使者多漁市南物因奏計京師持遺權貴鼎一無所市獨悉意精吏事事無大小必出於己凡調發綱吏度漕路遠近定先後爲成法於是勞逸均吏不能爲重輕官舟禁私載舟兵無以自給則盡盜官米爲姦有能居販自贍者市人持

以法不肯償所通鼎爲移州縣督償之舟人有以自給不爲姦而所運米未嘗不足也入爲三司鹽鐵副使自奉儉約當官明敏強直不可撓所薦士多知名有終身不識者

宋史王沿傳

盧秉字仲甫德清人有雋譽中進士甲科王安石置條例司奉使淮浙治鹽法出本錢業煮海之民戒不得私鬻遂爲定制提點兩浙淮東刑獄顓提舉鹽事持法苛嚴一歲中犯者以千萬數進制置發運副使東南饑詔損上供米價以糴秉言價雖賤貧者終艱得錢請但償糴本而以其餘賑贍是歲上計神宗問曰聞滁和民捕蝗充食有諸對曰有之民飢死相枕藉帝惻然曰前此獨趙抃爲朕言之耳先是發運使多獻羨餘以希恩寵秉言賦安得羨今

杭州府志

卷一百一十一

稱羨者率正數也請自是罷獻加集賢修撰

宋史盧革傳

任中正字慶之濟陰人進士及第眞宗時擢兩浙轉運使民饑中

正不俟詔發官廩賑之仁宗卽位拜兵部尙書卒諡康懿

宋史本傳

段少連字希逸開封人仁宗時權杭州觀察判官累遷三司度支

判官出爲兩浙轉運副使往時使者所至郡縣索簿書不暇殫閱

委之胥吏持以爲貨少連命郡縣上簿書悉緘識遇事間指取一

二自閱摘其非是者按之餘不及閱者全緘識以還由是吏不能

爲姦而州縣簿書莫敢不治部吏有過召詰曰聞子所爲若此有

之乎有當告我我容汝自新苟以爲無吾不使善人被謗卽爲汝

辨明矣吏不敢欺皆以實對少連每得其情諄諄戒飭使去後有

能自改過者猶保任之秀州獄死無罪人時少連在杭吏畏訊聚謀僞爲死者服罪欸未及綴屬少連已拏舟入城訊獄吏具服請罪以爲神明是時鄭向守杭無治才訟者不服往往自州出徑趨少連少連一言處決莫不盡其理少連通敏有才遇事無大小決遣如流不爲權勢所屈既卒仁宗歎惜之

宋史本傳

張夏字伯起雍邱人舉進士景祐中爲兩浙運使杭州江潮爲患故隄率用薪土潮水衝激不過三歲輒壞夏令作石隄上自六和塔下至東青門延袤一十二里因置捍江兵士五指揮專採石修塘隨損隨治衆賴以安杭民德之慶厯中立廟隄上

宋史河渠志萬厯志郎瑛

七修類稿

按宋史陳堯佐傳錢塘江籌石爲隄再歲輒壞堯佐請下薪實土乃堅丁謂不以爲是後卒如堯佐議而七脩類橐言杭州江岸率用薪土三歲輒壞張夏令作石隄杭民德之說正相反考宋史河渠志浙江通大海錢武肅王始築捍海塘造竹器積巨石植以大木隄岸旣固民居乃奠逮宋大中祥符五年浙江岸壞遣使同知杭州戚綸轉運使陳堯佐畫防捍之策七年發運使李溥請復用錢氏舊法實石於竹籠倚疊爲岸固以椿木環互可七里斬材役工凡數百萬踰年乃成至景祐中以石塘積久不治工部郎中張夏出使采石修塘衆賴以安邦人爲之立祠朝廷嘉其功封甯江侯是張在陳

後而萬厯志以官爲序故先張後陳今亦仍之而著其說於

此

李溥河南人
宋史有傳

孫甫字之翰陽翟人天聖進士皇祐間爲兩浙轉運使時范仲淹知杭州多以便宜行事甫曰范公大臣也吾屈於此則不得伸於彼矣一切繩之以法然退未嘗不稱其賢嘉祐元年遷刑部郎中

天章閣待制

宋史本傳歐陽修撰墓誌

田瑜字忠資壽安人舉進士慶厯中爲兩浙都轉運使按察使杭州龍山隄歲決水冒民居輒賦芻塞之瑜與民約每芻十束更輸石一尺率五歲得石百萬爲石隄隄固而歲不調民仕至龍圖閣

直學士

宋史本傳

直孫瑜字叔禮博平人仁宗時爲兩浙都轉鹽運使先是郡縣倉庾以斗斛大小爲姦瑜奏均其制黜吏之亡狀者民大喜有言其變新器非便下遷知曹州尋有言所作量法均一誠便者乃還其元資累官工部侍郎

宋史本傳

方慎言興化人第咸平三年進士仁宗朝歷浙江轉運使錢塘江決數十里慎言親庀工授材壘石列大木以殺潮勢賜璽書褒美

萬歷志

李復圭字審言豐縣人歷兩浙轉運使浙民以給衙前役多破產復圭悉罷遣歸農令出錢助長召人承募民便之瀕海人賴蛤沙地以生豪家量受稅於官而占爲已有復圭奏蠲其稅分以與民

熙甯初進直龍圖閣知慶州

宋史本傳

沈立字立之歷陽人舉進士累遷兩浙轉運使時茶禁害民山場
權場多在部內歲抵罪者輒數萬而官僅得錢四萬立著茶法要
覽乞行通商法三司使張方平上其議後罷權法如所請召爲戶

部判官出爲江淮發運使知越州杭州

宋史本傳

毛漸字正仲江山人第進士元祐中爲兩浙轉運使浙部水溢詔
賜緡錢二百萬以賑漸言數州被害卽捐二百萬倘仍歲如之將
何以繼之乃按錢氏有國故事起長安堰至鹽官徹清水浦入於
海開無錫蓮蓉河武進廟堂港常熟疏涇梅里入大江又開崑山
七耳茜涇下張諸浦東北道吳江開大盈顧匯柘湖下金山小官

浦以入海自是水不爲患加集賢校理

宋史本傳

常楙字長孺臨邛人淳祐七年進士簽書臨安府判官不爲權勢撓主管城南廂聽訟嚴明豪右益憚之都城火後瓦礫充斥差民船徙運在籍者百五十家惟二十五家應役餘悉爲勢要宦官所庇楙悉追之無不聽命又力拒戶部科買添差臨安通判命鞫封椿庫吏范成獄不肯承廟堂風旨無辜者悉出之度宗時爲兩浙轉運使禁戢吏姦不以急符督常賦鹽官歲爲鹹潮害稼楙請於朝捐金發粟復輟已帑大加修築新塘三千六百二十五丈名曰海晏塘是秋風濤大作塘不浸者尺許民得奠居歲復告稔邑人

德之遷戶部侍郎

宋史本傳

陳堯佐字希元閬中人舉進士爲兩浙轉運副使錢塘江隄以竹
籠石爲潮齧之不數歲輒壞而復理堯佐議實薪土以易之或言
其不可復隄久不成仍用薪土景祐四年拜同中書平章事謚文

惠

東都
事略

沈作賓字賓王歸安人以父任入仕慶元間除兩浙轉運副使入
對奏攢宮一司歲撥經總制錢爲緡率四萬有奇丹朶未弊加之
塗飾牆壁具存從而創易妄費固不足計無謂驚黷非所以安神
靈彰聖孝今後有合營繕聞於朝下守臣稽覈畫旨而後興役上
首肯再三而修奉者不樂也除權工部侍郎

宋史
本傳

王埜字子文吳人以父介廕補官登嘉定十二年進士第爲兩浙